


Il vischinadi da Cavorgia

Notizias historicas rimnadas
da Toni Hendry



Il vischinadi da Cavorgia

Notizias historicas rimnadas

La caplutta da s. Leci

La biala caplutta a Cavorgia ei dedicada a s. Leci. Tenor il studi historic da P. Baseli Berther «Baselgias e capluttas da Tujetsch» eisi stau d'anflar negliu notizias che havessen indicau l'entschatta da sia existenza. Mo ualti probabel eis ella vegnida baghegiada denter 1500 e 1600. Dals dus zenns porta il vegl negin datum, ferton che l'auter ei digl onn 1609. La dedicaziun croda sin l'emprema dumengia suenter la naschientscha da Nossadunna, ils 8 da settember, Num da Maria.

S. Leci ha adina teniu bein casa. Cul temps haveva el acquistau in pulit fondo cun il qual el ha susteniu pliras gadas generusamein baselgias, pervendas e scolas della vischunaanca. Aschia ha el denter auter gidau 1731 cun 250 renschs a baghegiar la baselgia da Rueras. Persuenter haveva il caplon da Rueras l'obligaziun da far 12 ga ad onn, inaga per meins, messa a Cavorgia. 1847 ha s. Leci contribuui al fondo da scola da Tujetsch 1300. — frs. e 1927 a s. Antoni per la nova caplutta a Surrein 1000. — frs.

Il pierti della caplutta ei vegnius baghegiatus vitier ca. 1880 e 1908 han ins renovau la caplutta dadens e dadora. 1911 ha ella obteniu in tetg da stuors galvanisau. Ina brava surlischada dil fondo ha la restauraziun dils onns 1933/34 dau. Quella ha custau total 9638.65 frs. Uonn ein ins vidlunder da dar colur il tetg da stuors empau da ruina ed adattar sia tschera meglier al contuorn.

En la caplutta da s. Leci fuva pli baul usit da recitar suenter rusari 5 paternos per ils 5 vischins da Cavorgia ch'ein vegni ils 23 da mars 1784 en ina lavina sil Vanatsch, nua ch'els havevan ina meidia fein a pastg. La disgrazia haveva tuccau: Str. Sep Maria Beer, Gion Casperin cun ses dus fegls Gion Flurin e Sep Maria e Gion Antoni de Pelly. Quei bi usit ei semantenius entochen entuorn 1930.

La scola

La casa da scola che stat aunc oz ei baghegiada igl onn 1848. Igl atun 1847 stuevan immens suffels haver derschiu ina massa uaul en Tujetsch. Cavorgia haveva aunc buca casa da scola. Ei vegneva dau scola zanua en in local privat. Las casas da scola da Sedrun e Rueras valevan tenor in rapport dellas



inspecziuns cantunala era buca fetg bia. Ei era in grond basegns da baghegiar novs baghetgs. Lenna fuva ei ussa avon maun e perquei ha la vischuna da Tujetsch concludiu igl unviern 1848 d'impunder la biala da quella lenna derschida per baghegiar novas scolas a Sedrun (Cadruvi), Rueras, Selva e Cavorgia.

El contract dils 3 d'avrel 1848 appartenent il baghegiar la scola a Cavorgia stat ei secret:

Contract: Ei daventau in Contract denter la Comissiun de Scola dina wart e maister Gion Antoni Schmedt de lautra wart, maister Gion Antoni Schmedt surpren da baghegiar ina Casa de Scola a Cavorgia en largezia denter las Preits $10\frac{1}{2}$ bratscha en largezia de mintga maun, che duei vignir faitg ina Stiva, in Stebli de trei e miez Bratscha e la Stiva 7 bratscha sin mintgia maun, con aung ina Combra el Giebel, deigi lura vigniu mess si Isiarchels e Canals e tablegiau las Grundas sin tuts mauns sut si. La stiva e stebli deigien ristar l'altezia de 13 quartas. Perquella laver paga la Comissiun al detg Schmedt in Capital de 85 fl

digiel oitgiontatschun Risculdis, e dus Thalers remess. Il Capital veing pagaus duas tiarzas sin Datun proxim, et ina tiarza deigi vignir dau empau pli liung tems, nonessent el Cass de saver pagar tut. Il maister ei lura obligaus de far la Lavor sco ei auda. La Lenna deigi vignir dulada sco quella dil Mucli ei stada dulada.

Tujetsch ils 3 de Avrele 1848.

Joseph Ant. Durgiai, Farrer
Johann Jacob Beer, Actuar

Era per il pinar ora e mobiliar la scola ei stau fatg in contract.

Tujetsch, ils 23 de Avrel 1849, eis ei daventau il sequent Accort de lavour denter Sigr. Lucas Caveng e Sigr. Scarvon Monn en Num della Comissiun de Scola e Meister Gion Antoni Schmed a risguart il pinar ora la Casa de Scola de Cavorgia et ei sco suonda:

1mo Sto il Meister Gion Antoni far ella maldigiada Casa dus Plentschius perdius en Stiva e Stebli castrai, e dus surengiu, dapli dus suren en il madem Stebli e Stiva. Item on cuschina in plentschiu suten daven dilg Esch casa entochen dadens ilg Esch Stiva, e suren avon Combra era il madem, sco era il plentschiu sura della Combra dilg Giebel.

2do In esch casa fatergiau, dus Eschs cun tablas sin la Stiva e Stebli et in cun arigels sin la Combra. Tuts quels Eschs sto el anferar e meter si.

3to Ina Scalla per ira sin Combra, e far oitg barcuns e quels anferar e meter si els, item tabliar entuorn la peginia e far ina fanastrel sut quella en.

4to Supias entuor la Stiva daven din Esch entochen lauter et era ina meisa, della Stiva liunga. Sco era ina supia de quella lungezia. En Stebli in letg et ina meisa ordinaria e duas supias pintgiás cun artg. Fus ei era aung de basegns de meter en ischenchels sche eis el era tier quei obligaus.

Tut quella Lavor sto lura esser buna e solida. Per quella lavour paga la Comissiun de Scola, f 55 dico tschunconta tschun renschs, sin ilg atun proxim de quest onn. Duess aber la lavour per munchonza dellas aissas buca saver vegnir fatgia entira en quest onn, sche veng il pagamen faitgs mo suenter della proportiun della lavour.

Per confirmaziun dilg Sura suttascrivien las parts contrahentas. Il Meister Gion Antoni Schmed, nunsavent scriver fa si sia Noda Casa.

Lucas Cavegn
sco Comissionau de quella vard

Sco emprem scolast en la nova scola han ins elegiu il giuven Leci Antoni Balzart per 45 fr.

Mo Cavorgia haveva gia giu avon scola, zanua en ina casa privata. En in rapport da Pl. Condrau da Mustér digl onn 1833 stat ei scret: «Per buca schar pli ditg la scola da Cavorgia orfonila hael jeu cun consentiment digl emprem gerau (en riguard la paga) e cun cussegli dil signur Janer (en riguard il personal) pladiu leu in scolast sut las condiziuns sco onn. Il cussegli d'educaziun vegn tenor empermischun a schar vegnir tier ad el in susteniment de 40.— fr.»

Ils 20 da schaner 1840 scriva igl «Ordinariats-Officium» da Cuera: «Tavetsch an Herrn Decan und Pfarrer Joseph Hitz: Auf das geziemende Ansuchen Namens der Einwohner des dortigen Filialhofes Cavorgia, es möchte demselben ein kleiner Beitrag aus dortiger vermöglchen Kapelle S. Lucii zur Haltung einer eigenen, wegen dem weiten und oft lebensgefährlichen Wege zur allgemeinen Pfarrschule, fast unentbehrlichen Hofschule bewilligt werden, erlaubt das Ordinariat, dass alljährlich ein Beitrag von fl. 20 aus benannter, dortigen Kapelle als Salarium eines Lehrers verabfolgt werden können gegen dem, dass

1. die Einwohner für die Nahrung des Lehrers selbst sorgen möchten,
2. alle Kinder zur Schule, und allen Eltern derselben zum Unterhalt des Lehrers pro rata verpflichtet seien, dass
3. Lehrer und Schule unter die Aufsicht des Pfarrers gestellt seien, und dass letzterer befugt sei, sowohl Materialien als Personalien der Schule zu entfernen, wenn sie den guten Sitten, oder der Reinheit der katholischen Lehre gefährlich werden sollten, endlich
4. dass diese Bewilligung auf zehn Jahre beschränkt sei, indem man erwartet, dass bis dorthin andere Hilfsquellen für diese Schule ausfindig gemacht werden können.

Chur, am 20. Jänner 1840

Das Ordinariat-Officium
für Selbes

Jac. Fr. Riesch, Canceller.

Ils 7 da zercladur 1880 scriva il departament d'educaziun al cussegli da scola della vischnaunca da Tujetsch:

«Aus den statistischen Tabellen des Schulinspektorate Kath. Oberland haben wir entnommen, dass der Lehrer der Schule in Cavorgia im letzten Schulwinter folgende Belohnung erhielt:

f 200 baar

f 100 in Naturalien

f 40 Wohnung und Holz

Sie werden hiemit eingeladen, sich beförderlichst unser vernehmen zu lassen, in was die Naturalien bestanden und wie dieselben gewerhet worden sind.»

Der Vice-Präsident
F. Manatschal

Il pagar ils scolasts ina part cun naturalias era usitau era en otras scolas. Mo scriva il departament d'educaziun en in auter liug ch'el seigi buca absolutamein encounter il pagar ils scolasts sin quella moda, stoppi denton pretender che quellas naturalias vegnien surdadas dal cussegli da scola al scolast, sinaquei ch'il scolast seigi buca necessitaus d'ir sez casa per casa per quellas.

Ina gliesta d'absenzas digl onn 1862/63 numna ils scolars ch'ein i a Cavorgia quei onn a scola:

- 1 Muggli Vigieli Giusep
- 2 Muggli Gion Rest
- 3 Monn Tumaisch
- 4 Monn Marionna Culastia
- 5 Peder Margretta Cristgina
- 6 Peder Gion Antoni
- 7 Peder Martin Felici
- 8 Peder Maria Barbla Catrina
- 9 Decurtins Rosa Martina
- 10 Deplazes Vigieli Antoni

Naven da 1883/84–1899/1900 ein d'anflar els protocols dil cussegli da scola ils numbs dils scolasts in suenter l'auter che han quels onns dau scola a Cavorgia, all'entschatta era la paga ed il diember dils scolars.

1883/84	scol. Josef Steiner, paga 340 fr.
1884/85–1890/91	scol. Gion Ant. Soliva, 340 fr. 12 scolars
1891/92–1893/94	scol. Gienal da Surrein-Sumvitg
1894/95–1895/96	scol. Placi Adalbert Schuoler, Sumvitg
1896/97	scol. August Schuoler, Compadials
1897/98–99/1900	scolasta Maria Caplazi

Da 1900/01 tochen 1915/16 ei buca stau scola a Cavorgia. Il diember da scolars fuva memia pigns.

Cun 1916/17 ha Cavorgia puspei obtenu ina atgna scola e quei tochen 1967/68. Quei davos onn ein ils sequents scolars e scolaras aunc stai a scola a Cavorgia:

Hendry Justina	8avla classa
Hendry Ida	8avla classa
Hendry Cecilia	7avla classa
Hendry Tresa	6avla classa
Hendry Guido	3. classa
Schmid Ervin	3. classa
Peder Pia	3. classa
Peder Giusep	2. classa
Monn Cornelia	2. classa
Monn Rosmaria	1. classa
Peder Beatrix	1. classa
Schmid Jovita	1. classa

Dau scola a Cavorgia da 1916/17 tochen 1967/68 han ils sequents scolasts, scolastas e seminarists:

1916/17–1920/21	Fidel Berther, Rueras
1921/22–1924/25	Simeon Silvester, Lontsch
1925/26–1927/28	Tumaisch Venzin, Sedrun
1928/29–1932/33	Gion Ant. Schmid, Surrein-Sumvitg
1933/34	Serafin Bundi, Trun
1934/35–1938/39	Gieli Cavegn, Breil
1939/40–1944/45	Teofil Schmid, Sedrun
1945/46–1946/47	Vigeli Berther, Camischolas
1947/48–1949/50	Leci Jacomet, Sedrun
1950/51	Carli Job, Trun
1951/52–1952/53	Albert Berther, Segnes
1953/54 e miez digl onn 1954/55	scol. Friberg, Danis
Il davos digl onn 1954/55	Gion Giachen Steier, Lontsch
1955/56	scol. Jakob Baselgia, Lontsch
1956/57	seminarist Cathomen Curdin, Breil
1957/59–1958/59	seminarist Gadola Mario, Mustér
1959/60	scol. Vigeli Venzin, Sedrun
1960/61–1961/62	seminarista Elsi Capeder, Pitasch
1962/63	seminarist Lothar Bearth, Rabius
1963/64	scolasta Tina Schatz, Cazis
1964/65	seminarist Baseli Berther, Rueras
	seminarist Julius Bucholzer, Rueun
	scol. Giusep Camenisch, Surrein-Sumvitg
	seminarist Gion Ant. Derungs, Surcasti
	seminarist Norbert Vinzens, Trun

1965/66	scol. Norbert Vinzens, Trun
1966/67	scol. Flurin Tschuor, Sumvitg
1967/68	seminarista Clara Deplazes, Rabius seminarist Rico Casanova, Mustér

Oz ei la casa da scola vita e bandunada. Ils aspects avon maun laian supponer che quella situaziun savessi cuzzar ditg. Ei sto semidar zun fetg ch'ei detti aunc in di zacu in temps che leghers scolars e scolaras frequentien quella casa da scola e sturnegien entuorn il baghetg che ha surviu tons decennis.

Il vischinadi

Tier quel udeva pli baul era Cavorgia-sura. Cu ils emprems habitonts e tgi ei secasau igl emprem en quels dus loghens ei sco per ils auters vitgs da nossa val buca d'eruir. Mo igl emprem ed enconuschenent mistral della Cadi alla fin dil 14avel tschentaner ei staus in Pieder da Cavorgia. Cavorgia exista pia silmeins 700–800 onns. Pli da vegl mava la communicaziun denter Tujetsch – Medel – Lucmagn per la gronda part tras Cavorgia – Plaun s. Leci. La via menava a Cavorgia-sura e da leu sur Stagias e Mutschnengia giu en la via sul Lucmagn.

Tenor la dumbraziun da 1768 fuvan a Cavorgia quei onn 5 fiugs cun 17 persunas, 11 umens e 6 femnas. A Cavorgia-sura eran 3 fiugs cun 20 persunas, 9 umens ed 11 femnas. Ils proxims decennis sto la populaziun da Cavorgia esser carschida zun fetg pertgei tenor prof. G. Gadola ein mo denter 1850 e 1877 49 persunas da Cavorgia emigradas en l'America.



1850, ils 11 da mars, ein ils emprems habitonts da Tujetsch emigrai en quella tiara. Da Cavorgia:

famiglia Rest Decurtins, 9 persunas
famiglia Gion Batt. Albin, 9 persunas
famiglia Giachen Biarth, 3 persunas

ensemun cun la famiglia Jos. Antoni Quinter da Sedrun che fuvan 3 persunas. Els seigien semess ils 18 ni 19 da mars sill'aua ed arrivai suenter 25 dis saunamein en la nova patria. Tuts ein secolocai el cantun Ohio a Nei Marianstein.

Cun il secund rot ord Tujetsch ei Gion Antoni Balzart cun sia dunna ed in affon ius ils 26 da fevrer 1851 en l'America.

Ils onns denter 1850 e 1880 era igl ir ell'America propi daventaus moda, quasi ina malsogna. 1854, ils 6 d'avrel, ein buca meins che 49 Tuatschins emigrai. Denter quels fuvan da Cavorgia

2 giuvens frars, Gion Antoni e Bistgaun Schmed
Giachen Ant. Deragisch e sia sora Maria Barla Lucia
Giachen Ant. Giacumet, sia dunna e 3 affons
Gion Batt. Balzart cun dunna e 2 affons
Leci Ant. Muggli cun dunna e 3 affons

18 persunas en inaga!

1872, ils 5 d'avrel ein emigrai ed arrivai a New York ils 26 d'avrel

Sep Antoni Muggli cun dunna e 2 affons
ed il giuven Gion Antoni Hendry,
cun els aunc 22 Tuatschins da Gonda e Sedrun.

Ils 24 d'avrel 1877 ein il giuven Sep Ant. Jacumet e sia sora Rosa Martina i ell'America.

Tontas persunas ord in vitg sco Cavorgia stueva haver slargau zun fetg. Pér 1907 ei aunc il giuven Giachen Martin Peder emigraus a s. Paul.

Ina famiglia Muggli da Cavorgia duei esser ida entuorn 1860 en Tiaratudestga.

Ultra della disgrazia dils 5 umens vegni ella lavina 1784 ha Cavorgia aunc giu in barschament igl atun 1907. Treis clavaus e la casa della famiglia Peder ein daventai in'unfrenda dellas flommas. Ils animals erien ins vegni da spindrar tochen sin in taur. La casa denton seigi barschada giu cun tut il fatglien. Igl emprem december 1907 ha la vischnaunca concludiu che mintga

cauvitg dils vitgs da Tujetsch dueigi trer si casa per casa ina collecta per ils donnegiai e da dar la lenna gratuitamein per turnar a baghegiar ils baghetgs barschai.

Enzacons decennis avon fuva aunc barschau a Plaun s. Leci in clavau. Stizzar havevien ins stuiu cun l'aua dil dutg plinenvi, dada neutier en cadeina cun sadialas. Denter ils umens che sdermenavien l'aua sil fiug fubi in aschi ferm ch'el vegnevi da trer ad ault l'aua ch'ella curdavi surengiu sil fiug e buca mo dallas varts en.

Da lavinas era Cavorgia in liug segir. Pér 1975 han las nevadas da quei unviern saviu far ina furbarola che negin havess mai sminau. Dalla Muota e la Vallatscha ei ina lavina sederschida cun tutta forza giu tras ils uauls, ha sdernau quasi tuts ils baghetgs dil Mises grond e cuchegiau giu atras igl uaul sul vitg. Aunc ina da quellas lavinas giu dalla Vallatscha savess oz periclitari era il vitg.




Ils habitants da Cavorgia havevan bi far il pur ed els eran spargnus, luvrus ed inschigneivels. Tut quei che era pusseivel fagevan els sez, lavurs da scrinari ed era da vischler. Sper l'aua della Val Gierm havevan els lur fallun e lur mulin. Con inschigneivels ch'ins fuva dava il cundrez dil mulin perdetga. (Ina part da quel ei aunc da veser el museum della Casa Grischa a Trun). Haveva in vischin da mular graun, empleneva el la tarmosa cun graun, metteva en funcziun il mulin e mava vid otras lavurs. En il funs della tarmosa era fermau ina cadeina che vegneva si tras il graun en ina latta che tunscheva ora en la canal dell'aua che menava la roda. Fuva la tarmosa svizada, vegneva igl uvierchel giufuns la tarmosa pesentaus dalla peisa della latta e quella curdava orasum da l'autra vart el liber cun ina pala da lenn en la canal d'aua e serrava giu quella. Il mulin vegneva aschi sclaus ed il muliner saveva turnar sco el leva e sco el veva peda ad emplenir la tarmosa per mular vinavon sin la medema moda.

Il fallun fuva era endrizzaus per pisar il sem-glin. Per far ora igl ieli havevan ins el pierti della casa da scola aunc il vegl cundrez da struclar la pasta messa el torchel cun agid d'in'agra, in quader da 4–5 m. 6–7 persunas ni aunc dapli sin quel pressiavan ora igl ieli in bien ton meglier ch'il cundrez a Sedrun. Ils pauns d'ielie che vegnevan ord il torchel duvravan ina banera per manizzar, mo cul maun gnanc raschieni. Oz ein mulin e fallun svani. Sco davosa restonza ha Placi Hendry transportau la mola mulin gronda a Gonda sur sia casa.

Cura che Cavorgia-sura existeva aunc, haveva il cavrer da Cavorgia dad ir cun las cauras ora sur il Rein della Val Gierm e si a Cavorgia-sura per prender leu era las cauras da gliez vitg. Da leu mava ei encunter la Val Gierm, sur il piogn dellas Ruttas, sil Cuolm Cavorgia e si dil Vanatsch en encunter ils Cotschens davos Plaunca aulta. In brav tur! Mo da malaura astgava el ir el Varetg. La gronda part della Val Gierm fuva ed ei aunc oz pastira dils possessurs dell'alp Pazzola e della vischnaunca da Medel. Co ils cavrers da pli baul stuevan sespruar da tener las cauras ord la pastira da biestga seregordan oz aunc biars che han fatg cavrer pli baul.

Denter ils vischins da Cavorgia ed ils possessurs dil territori della Val Gierm e l'alp Puozzas enasisum la val ha ei dau decennis, quasi tschentaners ora bravas dispetas e bia rizraz. Ei era ni lu ni ei oz pusseivel da far capeivel allas cauras, nua ellas astgien ir e nua buca. Da tut temps mitschavan las zeplas sin pastira buca lubida. Ei vegneva pindrau, sescagnau e sevilau e pretendiu dretgs cun e senza raschun. Ils 26 d'uost 1835 finalmein ein ins vegni da far ina clara entelgientscha denter las vischnauncas da Tujetsch e Medel e denter ils possessurs dellas alps Pazzola e Puozzas ed ils vischins da Cavorgia. En quella convenziun stat ei scret:

«En la vertenta questiu ch'existeva denter la Ludaivla Vischnaunca de Tujetsch d'ina Vart, e la Ludaivla Vischnaunca de Medell cun possessurs de



Il far ora ieli entuorn 1910

Mumper de Medel, e particullars possesurs dell'alp Pazolla en Vischnaunca de Muster, apartanentier ilg poder pischcallar sin l'alp de Pazolla cun las Chauras dilg Vischinadi de Cavorgia, eisei entras ils Signurs Gieraus d'ina Vischnaunca e lautra, cun aung auters comissionaj de quellas lautier, Suenter haver giu teniu ina Conferenza denter ils Sura, vegniu Sentelgiu e concludiu, zwar per evitar chautras Dischpettas, Cuosts e Spesas, et aung plj, Hass e malas Veglias che vessen chautras podiu Suondar denter Vischnauncas e Vischins confinonts, en Fuorma Sco Suonda:

1mo. Deigien ils Vischins de Cavorgia esser augtorisaj e patrunz, de puder guder cun Sias Chauras l'Alp de Pazolla entochen ils Dudisch de Fanadur Suenter Siu Plascher, quei ei la pistirra dell'Aua gronda navenda che veing denter ils Cuolms, nomnaij Cuolm Cavorgia e l'Alp Pazolla ora giu, e Schai enconter cuolm Cavorgia, tut.

2do. Dils Dudisch de Fanadur naven, entochen ch'ils Possesurs dell'alp Pazolla vann cun las Vachas u Chischada Sin Puozas, deigien ils Vischins de Cavorgia esser obligaj de taner giud quellas lur Chauras, e quei talvissa, ch'ils possesurs de Pazolla Seigien en munconza de quei, patrunz et augtorissai de puder quellas pindrar, e per Scadina quintar in Krizer.

Suenter aber ch'ils possesurs Seigien Sin Puozas cun la Biestgia, deigi la Pinderdirra curdar navenda, et aschia possiai buca vegnir pindrau plij; sondern, ils possesurs de Pazolla deigien haver ils Dreigts de puder chitschar navend, et ils Vischins de Cavorgia l'obligatiun de far Siu pussaivel de taner giu quellas, nomnadameing giud Puozas.

3to. Deigien ils Vischins de Cavorgia esser patrunz de poder guder la pistira de Chauras, quei ilg nomnau Vanatsch de tut Temps, cun la conditiun aber, ch'ei mondien e vegnien entras l'Alp dil Cuolm Cavorgia, e buca tras l'Alp dils de Pazolla, oreiffer de ruchas Auras, aber de Speras esser atens che la Chischada Seigi bucca Sut ilg nomnau Vanatsch.

4to. Era eisei Schau ils Dreitgs de part dils possesurs dell'Alp de Pazolla, alls Vischins de Cavorgia de puder temps de Ruchas Auras pischcullar la pistirra de Vachas, nomnau ilg Vareitg, quei ei, quei ilg quall Schaij dilg maun de Cuolm Cavorgia, Sco erra possi quella madema pistira vegnir tras las Chauras dils Sura nomnaj pischcullada entochen ils 12 de Fanadur Suenter Plischer; dilg rest aber, degien ei haver nagins Dreitgs de quella poder guder, ell Cass contrari aber deigien ils de Cavorgia esser Suttaposts alla Pinderdirra Sco ilg Art. 2 muossa, e quei navenda dils dudisch de Fanadur, entochen ils Oitg de September, priu orra ruchas Auras Sco Sura ei deitg.

Che la Sura Entelgiantscha Seigi daventada en Vissa, e Maniera sco Surra stad Scret, Sco erra, che quella Suenter esser Stada componida e legida avon alls Signurs chautier destinai acceptada, eisei per confirmatiun de quella vegniu tras ils Suttascrets d'ina vart e lautra Confirmau.

Muster ils 26 d'Augoust 1835

Johann Jacob Gieret sco
comissionau per Tujetsch

Christ Wenzin sco Gierau

Thomas Schmedt Comissionau

Ant. Capeder Comissionau el
Num della Lud. Vischn. de Medel
Gierau

Conrad Ludivic Carigiet,
comissionau dils Possessurs de
Mustér

Johanes Andr. Berher
sco Gierau de Tujetsch

Duri Hendry en num
dils particulars.

Oz dattan las cauras da Cavorgia buca da sestrer pli. Dapi entgins onns posseda negin leu pli talas.

Quei che fuva per Cavorgia il mender era la communicaziun cun Sedrun avon che la via che exista aunc oz vegni baghegiada. Quella han ins construui 1922/23. Avon mava ei dalla primavera entochen igl atun mo sur Surrein. Schi gleiti sco ei dava sufficientamein neiv, fagevan ins giudem las Vals ina surfisa sur il Rein. Lu fuva ei pusseivel d'arrivar a Sedrun da Clis en, ir sur il Rein e dils Puozs ni las Vals sut Sedrun si. Paupras mugias che stuevan trer las cargas lenna da leusi a Sedrun. Per arrivar da Clis enagiu spel Rein riscavan ins quasi la veta.

El protocol da vischnaunca dils 24 da zercladur 1909 stat ei scret:

4. Legia il signur president avon alla lud. radunanza da vischnaunca ina petiziun dada en dals vischins da Cavorgia, en la quala petiziun numnai vischins damondan dalla lud. vischnaunca l'erecziun d'ina commensurada via de communicaziun denter Cavorgia e Sedrun. Suenter haver tedlau giu il pareri dil signur president e suenter entgina ponderaziun en caussa, concluda la vischnaunca de surschar alla suprastanza da reponderar co ins savessi sin ina moda ni l'autra cul temps corrispunder alla petiziun da numnai vischins da Cavorgia.»

Ei resta cun quei. Ils 24 da mars 1911 repetan ils vischins da Cavorgia cun ina petiziun alla vischnaunca lur damonda per ina via carrabla sur onn. Puspei va nuot vinavon. Igl uaul Cavorgia havess massa lenna che fuss da pinar. Enstagl da baghegiar ina via vegn ins 1912 cun in project da transportar la lenna cun ina suga da Cavorgia a Sedrun. Cuosts da quella 7000.— frs. Era quei project vegn bess.

1912 vegnan ils onns da baghegiar la viafier. L'emprema uiara mundiala rumpa ora — ed il semudergiar da Cavorgia a Sedrun ed anavos resta vinavon. 1920 semuossa ina pussevladad da baghegiar la via sco via d'uaul. Ins concluda da schar far in project. Ils 23 d'octobre 1921 presentan ins quel alla vischnaunca. Ils cuosts ein calculai cun 72000.— frs. La radunanza da vischnaunca va d'accord sch'ei vegni garantii in subsidi da 50%. Mo sut cozza sto ei esser ina brava opposiziun encunter la via. Ils 7 da matg 1922 dat il president, signur Vigeli Venzin-Giger, part alla radunanza da vischnaunca, ch'ei seigi vegni priu si ina iniziativa encunter baghegiar la via. Il signur president che vesa sez en la necessitatad da quella via ei fetg per ella, dat aunc inaga in clar sclariment digl entir project ed ins passa suenter viva discussiun alla votaziun. 187 umens ein presents en la sala della scola a Sontget. Il salter sa buca decider la tscharna. Il president di ch'ei stoppi vegnir dumbrau las vuschs e quei mondi il pli tgunsch, sche quels che seigien encunter mondien dalla porta gronda ora. 33 umens sesaulzan e van giuadora, 154 sesan vinavon,

il project ei acceptaus, ils vischins da Cavorgia ellas neblas da saver spitgar finalmein sin ina megliera communicaziun cun Sedrun.

Oz stattan puspei 3 projects en damonda per ina midada della via a Cavorgia. Lein sperar che quel che vegn en damonda cuntenti era schi bein ils vischins leuvi sco quel da 1922/23 haveva cuntentau da lezzas uras, e che ina megliera communicaziun denter Sedrun e Cavorgia retegni la fin dell'emper-neivla ucliva leuvi a s. Leci.

Cavorgia/Tujetsch

Sentupada d'antieriurs scolars e scolasts

In singular inscunter

(Corr.) Sentupadas e reunions d'annadas e d'antieriurs scolars succedan aunc ualti savens ozildi. Denton, ina aschi singulara fiasta da sentupada sco a Cavorgia sespleiga mo darar. Igl idillic e ruasseivel vitget da Cavorgia ei prest per murir ora. Tgi e tgei po bein aunc spindrar la digren totala da quella magnifica ucliva. Ils iniziants, sut la reschia da Clemens Monn, han organisau l'entschatta settember ina sentupada da tuts scolars ch'ein i a scola da 1916–1968. A quella fiasta han els era envidau tuts scolasts ch'han dau scola leu duront quei temps. Franc ein ils organisaturs ed organisaturas vegni stimulai leutier d'in schar encrescher per lur car vitg patern. Els han spargnau negina breigia per che quella sentupada, l'emprema da tal gener, reusseschi. Els ein stai perschuadi che tuts quels che han stuiu encuir paun e fadigia egl jester visitassien puspei bugen ina ga lur vitg patern, igl origin da lur biala affonza. Pertgei mo tier ina tala occasiun han ils pli biars puspei ina ga la pusseivladad d'in retuorn el car vitget da Cavorgia.

E la participaziun ei stada surprendenta. Jeu crei che tuts antieriurs scolars e scolaras ch'eran en pei ed han saviu far liber dus dis ein caminai e carrai in magnific di d'atun, la sonda dils dus da settember 1978, viers Cavorgia. Entuorn las 16.00 crei jeu ch'il davos dils envidai havevi contonschiu la migievla ucliva da Cavorgia. Igl amicabel e curteseivel beinvegni – sco ins era gia disaus pli baul a Cavorgia – ha prest fatg esser da casa in e scadin. Bein han ins stuiu fixar e retener sia egliada sin ina fatscha u l'autra in tschec mumentin avon ch'ins sappi metter a casa ils antieriurs scolars.

Laud a Diu

Ils numerus fotografis vulan spert aunc perpetnisar sin film e fotografia la numerusa rimnada avon che serender ella biala caplutta da s. Glieci tier il survetsch divin, cun il qual la fiasta da sentupada pren sia entschatta. L'idillica caplutta po strusch tschaffar la rimnada. Sur Giusep Cathomas entscheiva il survetsch divin cun il cant da laud ed engraziament e tuts presents s'accordeschan e contan cun entusiassem per honur ed engraziament a Diu, ch'ha schenghegiau quei sublim e desiderau di da seveser en la cara ucliva. En siu priedi capescha sur Giusep oreifer da tschaffar l'attenziun dils presents. La



cumparegliaziun dil schar encrescher per la patria e casa paterna, quella flomma che brischa, mudregia e stezza pér tier il retuorn en la patria. Ina semeglionta flomma ardenta sequitescha e levgiescha nossa olma e nies intern pér tier la reuniu profunda cun Diu.

En emperneivla cumpignia

Suenter il survetsch divin serendan tuts envidai el vitg da Cavorgia per propi, en la casa d'albiert da giuvenils dallas famiglias Hendry. Leu vegr purschiu ina marendia, mo tgei marendia! «Nudels e plats» aschi ditg sco zatgi mo po, che fan honour allas cuschinieras. Ussa anflan ins propi temps e peda da sediscuorer culs anteriurs scolars, amitgs, amitgas e vischins da temps vargai. La legra cumpignia e discurrida lai passar las uras mo memia spert e gia han las valerudas cuschinieras semtgau ina grondiusa tscheina ella casa d'albiert da giuvenils da nies bien Clemens, il promotur dalla reuniu. Ina tscheina da perdananza che fa aunc oz litgar la bucca. Suppa da schambun, pulenta e groma e magnuc-caura, survida cun ina semeglionta gentilezia e curteisevladad da dunnauns e mattauns, ch'ins po nuot resister alla queida da magliar empau da memia. Mo per tuchegiar gliez vegr lura gidau suenter cun caffè empau benediu che metta puspei il magun strapazzau en pei.

Puspei anflan ins temps da sediscuorer culs vegls amitgs. Denteren muossa scolast Felici in film dalla biala ucliva e sia travaglia per memorisar als presents regurdientschas prest idas en emblidonza. Per variaziun suna ina musica indigena, e quei dat veta en la raspada. Giuvens e vegls che vulan aunc far enzatgei per la buna lingia carmalan las melodias da far ina saltada. Auters han mustgas da sededicar al giug da troccas, aschia che mintgin vegr a sia recreaziun preferida.

Las legras uras vargan mo memia spert. Ils ins entscheivan a sentir la stauncludad e serendan encounter casa ni els dormitoris preparai a Cavorgia. Ils auters datgan nuot dallas uras avanzadas e l'emperneivla cumpignia e buna luna carmala da far in'excepziun ed ir a letg ina ga per cu ils utschals schuletgan avon finiastra. Mo encounter la damaun ha il ruaus usitau curclau l'ucliva ed il pli davos ha anflau sia treglia per cupidar enzacontas uras, pertgei la dumengia entuorn miezdi dueva la fiasta continuar.

Ed ins s'entaupa puspei. Il cronist ei staus impediis da separticipar gliez di, mo ch'ins ha concludiu da puspei s'entupar en paucs onns, gliez fa plascher. Per tut il purschiu d'organisaturs, da dunnauns e mattauns e tuts participonts less jeu exprimer in cauld engraziament e Dieus paghi. – Quei ei stau ina magnifica fiasta da sentupada che vegr a restar a tuts participonts en buna memoria. Sin bien seveser tier la proxima reuniu.

A.B.

